



新世說卷五

易宗夔撰述

企羨第十六

魏叔子兄弟治古文山。中鄒程村一見歎曰。今乃有如是文乎。逢人輒稱道不絕口。海內知有三魏。實自程村始也。

魏公兄弟已見前。鄒名祇。謨江蘇武進人。順治十五年進士。性穎特。書過目不忘。事母以孝聞。母教之極嚴。公卽以讀書娛其母。上自經史子集。及天文宗乘百家之書。古今名人爵里。姓氏世次。年譜無不悉記。其於詩文。乃益工。

王阮亭兄弟。每過郵亭野店。輒題詩壁上。詩旣驚人。使筆斗大龍拏虎攫。尤西堂道經燕齊。見之。解鞍造食。坐對移晷。不能去。

王公爵里見前。兄指西樵。士祿言。尤公爵里見前。

彭羨門驚才絕艷。詞家推爲獨步。王阮亭稱其吹氣如蘭。每當十

郎輒自愧儉父。

彭名孫通浙江海鹽人順治己亥進士康熙十七年御試博學鴻詞第一授編修官至吏部右侍郎南昌重建滕王閣落成名流競賦詩推公作爲冠嘗步游蕭寺僧方製長明燈請爲賦公諾之僧退煑茗以餉茗未熟而賦成其敏捷如此

趙秋谷天才駿厲視儕輩無足當意獨善馮大木所師承者爲馮定遠嘗曰吾生平師友皆在馮氏矣。

趙公爵里見前馮大木名廷槐山東德州人康熙壬戌進士官中書性孤介不入大僚之門平生深契者爲秋谷朝士有得諸葛銅鼓者兩人各賦長歌諸名士皆閣筆漁洋欲哀兩人酬唱詩爲二妙集馮定遠名班江南常熟人著有定遠集其說詩力排嚴羽尤惡江西宗派而論事多達物情論文能究古法秋谷於近代文章家多所訾詆獨折服定遠一見鈍吟雜錄卽歎爲至論至具朝服下拜嘗展其墓以私淑門人刺卽塚前焚之

申鳧盟道生平有兩憾事一未覩滄海二未見周櫟園。

申名涵光直隸永寧人父端愍公盡節後以理學訓其兩弟皆能立身揚名一名涵煜一名涵暉

計甫草客鄴城。徧詢謝茂秦葬處。得之南門外二十里。見小冢頽墮荒草中。爲賦詩弔之。求其子孫不可得。因固請鄴中當事爲封土三尺餘。禁里人樵牧其上。立碣誌之曰。明詩人謝茂秦墓。

計公已見前。公過順德日。晡方就旅宿。忽念歸震川昔佐此郡。有廳記二篇。遂徒步入城求遺址不可得。乃入署傍廢園中。西向設瓣香流涕。再拜而後去。

李方山客南昌。有傳宋荔裳已死者。特爲詩弔之。與宋初未識也。後至武林。聞宋尙無恙。李喜甚。借友人馬疾馳相視。且出詩讀之。兩人因與泣下霑襟。已命酒狂飲極歡。策馬而去。

宋公爵里見前李名
日景山東淄川人

閩中邱則飛以賣鮫爲業。游於山水之間。喜吟詠。集成求雲間張洮侯作序。過虔州關。以詩謁權使者。見張序曰。詩能張洮侯作序。

豈尋常商賈耶。輒免其稅。

張名彥之江南華亭人卓犖知大節深沈好書尤喜自負使酒好侵人然實無他腸人以其是原之詩歌與董黃齊名

吳天章晚年買圃鄭谷之口蒔梅種橘吟詠自如王阮亭謂漢魏以來二千年間詩家號爲仙才者曹子建李太白蘇子瞻三人耳本朝作者如林不得不推天章爲仙才焉。

吳公已見前

徐電發天才駿發。搖筆數千言。龔芝麓尙書奇賞之。尙書臨沒。謂梁真定相國曰。奇才如徐君。可使之不成名耶。

徐公龔公爵里均見前

尹元孚督學江南。親操几席杖屨。徒步造謁方望溪於清涼山。及見北面再拜曰。曩在京師。母命依門牆。先生固執不宜。使衆駭遽。

今里居無嫌。且身未及門。心爲弟子久矣。蒙授喪禮。或問吾母之終寢處。食飲言語。得無大悖。成身之德。庸有既乎。

尹公爵里見前方公時。方治儀禮。因屬尹公欲共成一書。尹公曰。某未暇及此也。往者巡撫河南。會凶飢。未遑教治。居臺四涉月。而聞母病。今使事畢。歸廁九卿。當廷議。非忘身家。不足以答主知。若不能自樹立。徒附經術。以垂名抑微矣。必衰老。或以不職罷歸。然後可卒先生之業。越日。又走謁從者一人。望溪畏邦人疑詫。乃掃墓繁昌。入九華山以避之。

胡稚威驚才絕艷。獨冠一時。袁簡齋同應詞科。甚羨慕胡公。嘗曰。吾於稚威則師之矣。於元木循初則友之矣。其他某某則事我者也。

胡公袁公已見前。元木姓周。名大樞。浙江山陰人。工詩。與稚威在江東詩社中。最稱傑出。著有居易堂稿。循初姓萬。名光泰。乾隆丙辰舉人。穿穴六藝。排比百家。而尤精於周辭之學。詞科報罷。客津門。查氏著書。

沈東甫幼牧兄弟。著書最多。皆博而能精。同應乾隆丙辰召試。人

謂庶幾厚齋盤洲伯仲之風。李穆堂侍郎見其所著書驚喜曰：不意近世尚有此人。

沈東南名炳震浙江歸安人其著書之最精者有新舊唐書合鈔二百六十卷及讀史四譜唐詩金粉等書幼牧名炳謙

吳蘭雪詩才與黃仲則埒弱冠入都王述菴翁覃溪法梧門諸公盛稱之自是徧交海內名流酬唱無虛日袁簡齋最自負亦心折其詩所著香蘇山館集傳播外國朝鮮吏曹判書金魯敬以梅花一龕供奉之日本賈人斥重金購其詩扇以歸

吳名嵩梁東鄉人以諸生應乾隆甲辰召試不遇逾年舉於鄉以貲爲國子監博士改內閣中書與樂蓮裳同爲翁覃溪弟子同以才名遨遊王侯公卿間

張南山最服膺黃仲則之詩及王仲瞿之文嘗曰漢有建安七子初唐有王楊盧駱四家余欲選黃仲則詩王仲瞿文合刻之題曰

乾隆二仲。

張名未詳
黃王已見前

歐陽礪東少孤貧。非其力不食。有梁伯鸞徐孺子風。其湮鬱剛介。嚴凝之氣。一寓於詩。嘗謂作詩自寫胸中之天。不期而與古人合。鄧湘皋之輯沅湘耆舊集也。於有清二百年間。惟稱張度西及礪東二先生爲詩老云。

歐陽名輅博學多通書過目不忘屢試春官不遇
南走粵北爲薊代之遊與法梧門曾賓谷相唱和

張熙河性倜儻好游名山。九州歷其七。五岳登其三。足跡所至。賢士大夫如袁簡齋洪稚存孫淵如輩皆傾衿倒屣相見恨晚。

張名誠浙
江平湖人

高爽泉以善書著於時。愛交游。查刺史棣史郭明經頻伽彭上舍

甘亭朱漕督棊堂咸相與推襟送抱跌宕文酒蓋重其書並器其人也。

高名墉浙江錢塘人查名初揆浙江仁和人郭已見前彭名兆蘇江蘇鎮江人朱名爲弼浙江平湖人

莫子偲少與鄭子尹齊名精許書工篆籀詩亦古樸有味嘗與曾滌生訂交於海王村書肆中曾遺莫書云閣下與鄭先生游六合之奇攬之於一掬千秋之業信之於寸心其傾羨可謂至矣

莫名友芝貴州獨山人鄭名珍貴州遵義人著有說文逸字說文新附考汗簡箋正諸書

金友筠家園養晦以著述自娛甚羨俞蔭甫之學問文章然素未謀面光緒丁亥戊子間忽上書於曲園與訂神交而不署真姓名如漫郎聲叟之類自是尺素往來辭意肫摯時而爲文字之商量時而爲縞紵之投報拳拳敬愛歷久不渝通問之明年始以真姓

名告。

金名未詳青浦人自號無礙翁又號林陰
仰雪翁 俞公爵里見前曲園其所居也

林暉谷以翩翩華胄年少美才詩文皆臻上乘弱冠入洛一時名流羨之爭與訂車笠之盟如陳右銘伯嚴父子梁節庵黃仲弢沈子培嚴幼陵康長素梁任公諸人其最契者。

林名旭福建侯官人爲戊戌死難六君子之一 陳名寶箴江西義寧州人官至湖南巡撫戊戌政變去官禁錮於家伯嚴已見前其長公子也 梁名鼎芬廣東南海人 黃公爵里見前 沈君已見前 嚴名復福建侯官人英國某大學校畢業生精於哲學倫理學政治學嘗著譯天演論羣學肄言等書於新文學界有重名 康梁二君已見前

陳阜蓀懷才不遇落拓京華爲詩多幽渺哀怨之音詠秋海棠至數十律然極企羨譚壯飛之爲人嘗獨立譚公就義之菜市歎獻憑弔甚至痛哭不已亦奇人也。

陳名阮湖南湘潭人民國元年有燕臺雜詩二十首中有一首
云彎彎黃月透藜床遼海悲風萬里長莫歎焦桐音響絕朝衣
誰哭蔡中郎自注云余少有高世之志自比管幼安是時瀏陽
譚壯飛才學閎肆心儀其人戊戌政變死菜市譚名嗣同湖
南瀏陽人湖北巡撫譚繼洵之子博學多才識見尤卓著有仁
學一書士林稱之光緒戊戌春夏之交與熊希齡唐才常等在
湖南創立南學會及湘報館湘人士始競趨於新學旋奉召來
京以四品卿爲軍機處章京與康長素梁任公林暉谷楊叔嶠
諸人佐德宗一意變革朝政至八月而孝欽皇
后垂簾康梁遠颺公遂爲死難六君子之一

傷逝第十七

魏伯子遇害於賊將劉大任許其子興士聞變徒跣往迎喪抵家
拔劍自刎左右持之遂日夜椎胸哭死血結少腹下目上眵僂不
能立呼號二十日而死年三十有三時人比之何炯謝蘭云

魏伯子已見前興士名
世傑著有梓室詩文集

陸麗京與沈駿明素無深好聞沈負才蚤世乘醉達其家哭之失

聲從子儂胡隨往亦一哀出涕。

陸公已見前沈名炳浙江錢塘人

趙山子既沒有人議其短長。吳聞瑋擲杯謾罵曰。斯人不死。鼠子敢爾。

趙名濡江南吳江人癸丑孝廉吳名鏘一字玉川吳江人好游喜爲詩每遇名流勝集言論娓娓可聽娶龐氏字蕙纒亦工詞翰嫁時奩具頗厚以吳不問生產傾奩佐之情安淡泊晨昏或不給唱和自如

王異公賦十二哀詩追數舊游多化異物纏綿悱惻各竭思盡致能令讀者傷神。

王名撰江南太倉人古懷落落生平不妄交交必終身以之

陳緯雲云鄒程村董文友相繼殂謝蘭陵舊游不可復尋言之悽然不必過黃公酒壚而始慟矣。

陳名維岳其年之弟江南宜興人鄒公已見前董名以寧江南武進人少負才望豪邁感慨不可一世博覽強識著書滿

家執經問難弟子恆數百人

彭中叔與同邑溫應搏友善應搏死於兵難時兵燹蒼黃人莫敢書行公獨往購其尸痛哭而殮之

彭名任江西寧都人結廬嘯山所居曰一草亭足不履城市

劉稚川九歲失恃每念母輒爲孺子泣遂以岷思名其堂所著曰

岷思堂集

劉名克猷湖北黃岡人順治六年廷對第一官修撰與熊伯龍齊名

世宗在潛邸聞閣百詩名手書延至京師握手賜坐呼先生日索觀所著書每進一篇未嘗不稱善旋卒於京寓世宗哭之慟遣官經紀其喪自製挽詩四章中有三千里路爲予來之句復爲文祭

之。有云讀書等身。一字無假。孔思周情。旨深言大。僉謂非閻公不能當也。

閻公已見前。公疾亟。時請移邸外。就醫留之。不可。乃以大牀爲輿。上施青紗帳。二十人舁之。出安穩。如床簣。不覺其行也。旋卒。爲康熙四十二年六月也。

張公煌言死國難。棄骨荒郊。萬充宗葬之南屏山。並乞黃太冲誌其墓。春秋野祭。效西臺之哭者十餘年。

萬公已解見前

毛大可侍史曼殊。豐臺賣花翁女也。豔麗而能詩。諸名士爲文以繩之。晚歲悼亡。忽忽不自得。

毛公已見前

計甫草有才子曰準。早夭。築思子亭。以孝貞女宋氏合葬。宋氏準

聘妻年十三。未婚守志者也。

許公已見前

趙秋谷篤於故舊。生死不渝。同年生萊陽張庶常罷歸。以事爲有司所窘。避地依公。及卒。殯而歸之。常熟仲生依公十九年。卒於館次。爲位以哭。并論定其詩文。擇地葬之。

趙公爵里見前

姜西溟副修撰李蟠典順天鄉試。以目昏不能視。爲同官所欺。牽連下吏。舉朝知其無罪。未置對遽病卒。王阮亭尙書哭之慟。且曰。某在西曹。使湛園以非罪死獄中。愧死矣。

姜王二公爵里見前。湛園姜別字也。

翁朗西晚與沈歸愚相約耦耕。結廬有日矣。未幾卒。友生爲位哭。

多失聲者。

翁名照江南江陰人國子生著有賜書堂詩文集詩識力俱高有虞伯生老吏斷獄之目

厲樊榭無子沒後四十餘年與其妾月上栗主並委榛莽中何春渚取歸送黃山谷祠灑掃一室供之王蘭泉侍郎聞其事屬同人於忌日薦酒脯焉。

厲公已見前何名淇浙江錢塘人王公爵里見前

程魚門以逋負山積勢不支乞假赴陝將謀諸畢秋帆中丞爲歸老計抵關中一月而卒畢與幕府諸公哭之甚哀並經紀其喪厚賻之以歸。

程畢二公爵里見前

黃仲則在京爲債家所迫抱病踰太行出雁門將往畢秋帆許次

新世說傷逝

八

解州卒於河東運使沈業富官署年僅三十有五畢公厚賻之洪
稚存料簡其喪送柩歸里誄詞哀愴又檢其詩及樂府四大冊封
送畢公囑其刪定付梓卽兩當山房集是也

黃畢洪三公均見前黃公有出關與畢侍郎賤有云日在西隅
始展黃君仲則殯於運城西寺見其遺棺七尺枕書滿篋撫其
吟案則阿嬰之遺牋尚存披其總帷則城東之小史旣去蓋相
如病肺經月而難痊昌谷嘔心臨終而始悔者也猶復丹鉛狼
籍几案紛披手不能書畫之以指此則杜鵑欲化猶振哀音驚
鳥將亡冀留勁羽遺棄一世之務留連身後之名者焉又云此
君生平與亮吉雅故惟持論不同嘗戲謂亮吉曰予不幸早死
集經君訂定必乖余之旨趣矣省其遺言爲之墮淚今不敢輒
加朱墨皆封

送閣下云云

洪稚存客西安使院得其弟自京師來書知適汪氏仲姊之喪爲
位而哭之作誄詞一章中有言旋言歸靡復伯姊之問松耶柏耶
遂拱女嬃之里等句極爲沈痛